

Kolosi 3:12-17

12 God em i makim yupela pinis, na yupela i stap ol lain manmeri bilong en, na em i save laikim yupela tru (*splanchna oiktirmou*). Olsem na yupela i mas kisim olkain pasin olsem. Yupela i mas sori tru long ol arapela na mekim gut long ol. Yupela i mas daunim yupela yet na mekim pasin isi long ol man, na yupela i no ken belhat kwik long ol man i rongim yupela. **13** Sapos wanpela man namel long yupela em i gat tok long narapela brata i bin mekim rong long em, orait em i mas karim dispela hevi na lusim sin bilong dispela brata. Bikpela em i lusim pinis sin bilong yupela, na olsem tasol yupela tu i mas lusim sin bilong ol arapela. **14** Yupela i mas givim bel bilong yupela long ol arapela manmeri. Dispela pasin i winim tru olgeta arapela pasin, na em i save mekim ol arapela gutpela pasin i kamap strong na i wok bung wantaim. **15** Krai i save givim bel isi long yumi na mekim yumi i stap wanbel, na dispela bel isi i ken bosim tru bel bilong yupela. God i bin singautim yupela bai yupela i ken kamap wanpela bodi tasol na i stap wanbel tru. Na yupela i mas tenkyu long God oltaim. **16** Yupela i mas larim tok bilong Krai i stap strong insait long bel bilong yupela. Yupela wan wan i mas skulim ol arapela Kristen na givim gutpela tingting na save long ol, bai ol i ken mekim gutpela pasin tasol. Yupela i mas tenkyu long God long bel bilong yupela, na yupela i mas singim ol song bilong Buk Song na ol arapela song bilong lotu na ol song Holi Spirit i kamapim long bel bilong yupela. **17** Long toktok bilong yupela na long wok bilong yupela na long olgeta samting yupela i mekim, yupela i mas mekim long nem bilong Bikpela Jisas. Na long nem bilong em yupela i mas tenkyu long God Papa.

- Galesia 3:27-28 Yupela ol manmeri i bin kisim baptais na i pas wantaim Krai, yupela olgeta i bin pasim Krai olsem man i pasim longpela **klos** bilong en. Na long lain bilong Krai, i no gat ol Juda na ol Grik. I no gat ol wokboi nating na ol man i stap fri. I no gat ol man na ol meri. Nau long Krai Jisas yupela olgeta i stap wanpela tru.
- Mak 6:34 Olsem na taim Jisas i go sua em i lukim bikpela lain manmeri i stap Na em i sori tru long ol (*esplanchnisthē*), long wanem, ol i olsem ol sipsip i no gat wasman. Na em i stat long givim planti tok long ol.
- Luk 10:34 Tasol wanpela man bilong Samaria em i wokabaut long rot na i kam kamap long dispela man. Em i lukim em, na bel bilong en i sori tru long em (*esplanchnisthē*).
- Martyu 5:3, 5, 7 Ol manmeri i save, ol i stap rabis tru long ol samting bilong God, em ol i ken amamas... Ol manmeri i save daunim nem bilong ol yet, em ol i ken amamas....Ol manmeri i save marimari long ol arapela, em ol i ken amamas.
- Jon 13:34 Na nau mi givim nupela lo long yupela olsem, yupela wan wan i mas laikim tru ol arapela. Mi bin laikim yupela tru, na olsem tasol yupela wan wan i mas laikim tru ol arapela.